



La dretgira federala ha decidì l'entschatta da quest onn che l'outlet a Landquart na sa chattia betg en ina zona turistica e na dastgia betg avrir la dumengia.

FOTO Y. BÜRKLI

Sa drizza l'outlet a clientela internaziunala?

Midada da l'ordinaziun davart la lescha da lavur

■ (anr/vi) Il chantun sa futra da la sentenza da la dretgira federala che l'outlet a Landquart na dastgia betg avrir la dumengia. Ins midia gea prest l'ordinaziun, argumentescha la regenza. La midada vala dentant per centers da cumpra cun clientela internaziunala.

La dretgira federala ha decidì l'entschatta da quest onn che l'outlet a Landquart na sa chattia betg en ina zona turistica e na dastgia betg avrir la dumengia. Il chantun grischun stuess gia daditg exequir la sentenza. La regenza sa dostà dentant cun l'argument: La confederaziun planiseschia gea tuttina da midar l'ordinaziun, uschia che la lavur da dumengia en l'outlet na saja lura nagin problem pli.

Cun la midada dastgan centers da cumpra per clientela internaziunala engaschar la dumengia il persunal senza dumandar lubientschas spezialas. La moziun da Fabio Abate giavischava numnadamain ch'ils centers da cumpra als cunfins tessinais possian restar averts la dumengia cura ch'ils Talianers vegnian a far cummissiuns en Svizra. Ma vala quai uss era per Landquart?

Sch'ins prenda sut la marella la midada e l'explicaziun dal cussegl federal vesan ins svelt: L'outlet croda strusch sut l'artitgel proponì.

Per clientela internaziunala

L'artitgel vala numnadamain sulet per «centers da cumpra» per «ils basegns dal turissem internaziunal». Quels dastgan laschar lavurar il persunal la dumengia. È l'outlet cun ses pitschens bajetgs insomma in center da cumpra? Ils derschaders a Losanna renconuschan che l'outlet vala sco unitad, uschia che betg mintga fatschenta sto dumandar ina lubientscha speziala.

Pli critic èsi cun la premissa da la clientela internaziunala. «Il focus da la nova disposiziun stat sin il turissem internaziunal», scriva il cussegl federal en sia explicaziun. Tant la svieuta da l'entir center da cumpra sco era quella da la maioritad da las singulas fatschentas stoppia vegnir fatga cun clients da l'exteriur.

Enpli sto il center da cumpra vender «per gronda part artitgels da luxus». I sa

tractia dad uras e bischutaria en in aut segment da pretschs e da vestgadira da design. Cun «per gronda part» èsi manegia ch'ils artitgels da luxus fan ora dapli che la mesadad da la purschida.

10 kilometers davent dal cunfin

Il center da cumpra sto plinavant sa chattar u en in territori turistic u pli pauc che 10 kilometers davent dals cunfins. Cun questa distanza vul ins pussibilitar in turissem da cumpra sco en il Tessin. L'outlet da Landquart è dentant pli lunsch che diesch kilometers davent dals cunfins.

Tuts criteris da la disposiziun ston esser ademplids per valair sco center da cumpra per ils basegns dal turissem internaziunal, scriva il cussegl federal.

La disposiziun è ida l'entschatta da quest onn en consultaziun ed i po dar ch'il cussegl federal modifitgescha anc in u l'auter detagl avant che metter en vigur la midada. Per che quella daventia applicabla sin l'outlet a Landquart stuessan dentant bunamain tuts criteris vegnir adattads.